

# Berita RAKAN PENABUR

Warta Suku Tahun yang menghubungkan pelayanan penerbitan dan gereja BM



**WAWASAN  
PENABUR**

Sowing BM Christian Resources  
Bridging Christian Communities

### Misi Wawasan Penabur:

1. Mengembang & mengedar bahan-bahan sumber BM Kristian dengan bekerja-sama dengan Gereja BM di Malaysia.
2. Membangun kesedaran tentang peluang dan cabaran-cabaran yang dihadapi oleh Gereja BM.
3. Menjadi jambatan antara Gereja BM dan bukan BM.

### Berita Rakan Penabur

ialah penerbitan berita elektronik pelayanan Wawasan Penabur

### Alamat Surat-Menyurat:

P.O.Box: 8327  
Pejabat Pos Kelana Jaya,  
46787 Petaling Jaya  
SELANGOR  
Tel/Fax: 03-5888 4987  
Email: wawasan.penabur@gmail.com  
Website: wawasanpenabur.org

## Mendidik Generasi Pelapis Kita

Minggu lalu kami sekeluarga menonton sebuah filem 1995, "Mr. Holland's Opus". Mr. Holland adalah seorang guru muzik di sebuah sekolah, yang berusaha membuat muzik bermakna dan relevan kepada murid-muridnya. Ketika dia hampir bersara, sekolah itu tiba-tiba memotong semua bajet untuk program muzik. Ini merupakan satu tamparan kepada guru muzik yang berdedikasi, yang sentiasa cuba menggalakkan pelajar-pelajarnya untuk mengambil bahagian dalam orkestra dan muzikal sekolah. Ketika dia berkemas-kemas dengan penuh kesedihan, dia mula tertanya-tanya jika semua yang telah dilakukannya selama ini hanyalah sia-sia saja.

Tiba-tiba dia mendengar bunyi dari auditorium. Dia mendapati tempat itu penuh dengan pelajar-pelajar yang dia telah ajar sejak puluhan tahun, dan mereka semua sudah pun melakukan sesuatu dalam hidup mereka. Seorang wanita muda naik ke podium dan berkata pencapaian yang dikecapinya sekarang adalah kerana galakan yang diberikan oleh mantan guru muziknya, Mr. Holland semasa dia berada di sekolah tinggi. Mr. Holland telah membangun keyakinan dirinya dan dia berubah daripada seorang gadis pemalu kepada seorang ahli politik, yang akhirnya menjadi gabenor negeri itu.

Kita mempunyai pengaruh yang kuat ke atas kehidupan orang muda. Sama seperti Mr. Holland, kita mungkin tidak sedar bagaimana kita memberi kesan kepada kehidupan orang lain, dan dalam kebanyakan kes, kita mungkin tidak akan tahu. Tetapi jangan silap mengenainya, kita mempengaruhi orang lain, terutama golongan muda.

Tahun ini, Wawasan Penabur memberi tumpuan kepada golongan muda di Sekolah Minggu, sekolah menengah dan kolej. **Lapan Permata** dan **Yesus Mesias** adalah projek baru kami pada tahun ini.

Kita perlu bertanya kepada diri sendiri beberapa soalan penting. Apakah jenis pengaruh kita kepada generasi muda? Bagaimana kita boleh membantu kanak-kanak dan belia dari Gereja BM? Adakah kita membantu mereka bertumbuh dalam hubungan peribadi mereka dengan Tuhan? Ini adalah soalan yang perlu dijawab oleh para ibu bapa, guru, pemimpin Sekolah Minggu dan pemimpin belia, bahkan sesiapa sahaja yang terlibat dengan pelayanan generasi pelapis Gereja.

Kita mahu anak-anak kita membesar menjadi orang dewasa yang kuat, bijak, yakin, mampu dan matang. Tetapi kita mahu lebih daripada itu. Kita mahu mereka bertumbuh dalam iman dan mengikuti Yesus sepanjang hidup mereka. Kita mahu anak-anak melihat kasih Yesus di dalam hidup kita dan bagaimana iman Kristian kita membentuk kehidupan kita.

Semoga Tuhan mencabar kita untuk melihat ladang tuaian yang sedang menguning. Jangan biarkan "orang lain" melakukan penuaan semata-mata kerana kita gagal untuk melabur ke dalam kehidupan generasi pelapis Gereja Malaysia.

## **Sekolah Minggu** **Seorang Guru Datang Daripada Allah**

Saya bertanya kepada anak saya yang berumur 6 tahun tentang guru Sekolah Minggunya. Dia menjawab, "Seorang guru yang baik datang daripada Allah." Itu satu pernyataan yang besar sekali. Kita memerlukan pendidik yang seperti Kristus, untuk sekolah-sekolah dan gereja. Nikodemus berkata kepada Yesus: "Rabbi, kami tahu bahawa Engkau guru yang datang daripada Allah." (Yohanes 3:2, AVB) Penggunaan kata "kami" menunjukkan bahawa Nicodemus berkata untuk sekumpulan orang, mungkin ahli-ahli Sanhedrin berprestij yang lain.

Di Sabah dan Sarawak, di mana dua pertiga daripada umat Kristian Malaysia didapati, guru Sekolah Minggu memainkan peranan yang amat penting dalam memuridkan generasi akan datang, terutama sekali di kawasan pedalaman. Di kebanyakan situasi, guru Sekolah Minggu adalah satu-satunya sumber pendidikan rohani untuk kanak-kanak yang berusia 4 hingga 12 tahun. Dan di kebanyakan waktu, mereka perlu membatalkan pengaruh Islam yang kanak-kanak terima sepanjang minggu dari sekolah-sekolah dan tadika Kemas.



Sayangnya, dua jam yang diperuntukkan di Sekolah Minggu biasanya hanya diisi dengan permainan, nyanyian dan aktiviti mewarna. Sesi Sekolah Minggu yang baik memerlukan banyak persediaan doa dan kreativiti. Namun ganjarannya tidak ternilai, kerana pelaburan yang diperuntukkan untuk setiap kanak-kanak itu adalah berbaloi.

Pelayanan Kanak-kanak melampaui hanya menjaga anak-anak supaya mereka dapat duduk diam sementara orang dewasa mengikuti kebaktian. Ia sebenarnya adalah satu pelayanan melayani Tuhan kita melalui penginjilan anak-anak dan kemudian membawa mereka bertumbuh dalam pengetahuan untuk mengenal Penyelamat kita.

### **Penginjilan**

Kita melayani anak-anak kita dengan menginjili mereka. Guru-guru Sekolah Minggu mesti berkongsi Injil dengan kanak-kanak di bawah jagaan mereka.



Ancaman kepada Gereja di Malaysia bukan daripada gerakan dakwah pengislaman yang agresif sahaja, tetapi nominalisme di kalangan generasi Kristian yang ke-2, ke-3 dan ke-4. Mereka tidak tahu apa dan mengapa mereka percaya. Oleh itu, apabila kumpulan dakwah itu datang dan memberikan beberapa soalan asas tetapi sukar, atau apabila mereka bertemu dengan seseorang dari iman yang berlainan, ia tidak mengambil banyak masa bagi mereka untuk menyangkal Kristus dan memeluk agama baru.

#### **1.2 bil NON-PRACTISING CHRISTIANS**

There are about 1.2 billion – 60 per cent of the Christian community – nominal or non-practising Christians in the world, according to an estimate by Operation World 2000.

Ibu bapa Kristian harus melakukan segala-galanya dalam kuasa mereka untuk memastikan anak-anak mereka terdedah kepada Injil. Tidak cukup untuk hanya membawa mereka ke gereja dan Sekolah Minggu; ibu bapa perlu berdoa untuk dan dengan mereka, dan membaca Alkitab dengan mereka di rumah. Apabila kanak-kanak mendengar Injil dikhutbah, diajar dan dipraktikkan dalam hidup, mereka akan lebih cenderung untuk datang kepada Yesus pada usia yang muda.

Menurut Gallup Survey baru-baru ini, 19 daripada 20 orang yang menjadi Kristian berbuat demikian sebelum berumur 25 tahun. Pada usia 25 tahun, satu dalam 10,000 akan menjadi orang yang percaya; di usia 35 tahun, satu dalam 50,000; di usia 45 tahun, satu dalam 200,000; di usia 55 tahun, satu dalam 300,000; dan di usia 75 tahun, satu dalam 700,000.

### **Melampaui Injil Penyelamatan**

Betapa berharganya apabila seorang kanak-kanak mengaku iman dalam Yesus! Dan lebih berharga lagi apabila seorang kanak-kanak memutuskan untuk hidup keseluruhan hidupnya bagi Yesus!



Pernah sekali D. L. Moody pulang dari satu pertemuan dan melaporkan tentang dua setengah pertaubatan. "Dua orang dewasa dan seorang kanak-kanak, bukan?" tanya tuan rumah. "Tidak," kata Moody, "dua kanak-kanak dan seorang dewasa. Kanak-kanak memberikan keseluruhan kehidupan mereka, sedangkan orang dewasa itu hanya mempunyai separuh daripada hidupnya yang tinggal."

Selepas anak-anak kita menerima keselamatan, kita mesti mendedahkan mereka kepada Firman Allah. Seperti ibu bapa yang dahulu, kita juga mempunyai tanggungjawab untuk menunjukkan kehidupan iman kita dalam Yesus supaya generasi muda dapat melihat bahawa Dia adalah sesuatu yang bernilai untuk dikenali. Anak-anak kita dapat menangkap jika iman kita tidak mengubah kehidupan kita, atau menjadikan kita orang yang lebih baik. Kanak-kanak cepat membezakan kepura-puraan orang dewasa. Jika kita menunjukkan Yesus di hadapan anak-anak kita, mereka akan lebih cenderung untuk tertarik kepada-Nya pada usia yang dini dan akan tetap setia kepada-Nya ketika mereka mendewasa.



Guru-guru Sekolah Minggu juga perlu mengenal Yesus secara peribadi dan bertumbuh dalam Firman-Nya. Hanya selepas itu mereka boleh memberi pengaruh kepada kanak-kanak di bawah jagaan mereka. Jadi, seorang guru Sekolah Minggu yang baik adalah seorang guru yang "datang dari Allah", yang memperkenalkan Injil kepada kanak-kanak dan memuridkan mereka supaya mereka akan kenal, takut dan berjalan dengan Allah sepanjang hayat mereka.

# Menabur Bahan Sumber BM Kristian

## Lapan Permata: Pelajaran Pelayanan Kanak-Kanak

"Karena hikmat lebih berharga dari pada permata, apapun yang diinginkan orang, tidak dapat menyamainya." (Amsal 8:11, TB)

**Lapan Permata** mempunyai sejarah yang panjang. Pada asalnya ia ditulis di Indonesia pada awal 1960-an oleh dua orang mubaligh Jerman, Ruth Laufer dan Anni Dyck. Oleh itu, gereja-gereja di Sabah dan Sarawak telah menggunakan **Suara Sekolah Minggu (SSM)** yang dalam Bahasa Indonesia seawal tahun 1980-an, sehingga ke hari ini. Tetapi **SSM** tidak mudah diperolehi. Pada 15 Ogos 2007, tiga kotak bahan pendidikan Kristian (iaitu **SSM**) dari Indonesia milik SIB Sabah telah dirampas di LCCT Sepang atas alasan ia mengandungi perkataan "Allah". Maka bermulalah kes mahkamah yang panjang di antara SIB Sabah dengan Kementerian Dalam Negeri.

Sejak itu, gereja terpaksa bergantung kepada **SSM** yang difotokopi yang dijual pada RM 38/salinan. Jika diimpor, edisi Bahasa Indonesia itu berharga Rp. 90,000 sebuah dengan biaya pos yang hampir sama dengan harga buku itu, serta berisiko dirampas. Kerana kos yang tinggi, kebanyakan gereja hanya mampu mempunyai satu set (atau sebahagian) bahan-bahan untuk dikongsi bersama oleh guru-guru Sekolah Minggu.

Melihat keperluan yang mendesak di Malaysia, Sun Focus Foundation (penerbit untuk Creative Bible Lessons) telah menghubungi wawasan Penabur untuk menterjemahkan bahan-bahan itu (18 jilid, termasuk 2 jilid Panduan Mengajar) ke dalam Bahasa Malaysia, untuk dicetak dan diedarkan di Malaysia. Tujuan projek ini adalah untuk memperkasakan guru-guru Sekolah Minggu dan Pelayanan Kanak-Kanak (termasuk Tadika) supaya mereka dapat dibekalkan untuk mengajar kanak-kanak. Misi Wawasan Penabur ialah untuk menabur bahan sumber Kristian dalam Bahasa Malaysia untuk membangun dan menguatkan iman umat Gereja BM di Malaysia.



"Karena hikmat lebih berharga dari pada permata." Dari ayat inilah projek itu dinamakan **Lapan Permata**. Kulit bukunya yang unik menggambarkan perhiasan diri pelbagai suku Kristian di Sabah dan Sarawak. Bagi mereka, perhiasan sangat berharga dan ada beberapa jenis manik yang begitu berharga sehingga nilainya boleh membeli sebuah rumah panjang! Namun, hikmat adalah lebih berharga daripada itu. Dan inilah doa kami supaya ibu bapa dan gereja-gereja akan melihat pentingnya untuk memuridkan generasi muda kita.



**Lapan Permata** ialah satu kurikulum lapan tahun untuk kanak-kanak berumur 5-12 tahun dengan memberi tumpuan kepada pengajaran Alkitab dari Perjanjian Lama dan Baru. Ia mempunyai pelbagai alat bantu mengajar dan aktiviti untuk membantu kanak-kanak dalam proses pembelajaran mereka. Kurikulum Lapan Permata meliputi 95% daripada Alkitab.


Setiap **Permata** mempunyai 52 pelajaran, untuk pengajaran selama setahun dalam 2 jilid. Projek ini adalah kerjasama dengan Sun Focus Malaysia di mana mereka akan menjalankan seminar dan latihan untuk membantu gereja-gereja dan pemimpin Pelayanan Kanak-kanak memahami dan menggunakan Lapan Permata dengan efektif.



Projek **Lapan Permata** ini melibatkan 11 penterjemah dan 3 orang penyunting, dan diharapkan siri yang lengkap akan tersedia di bulan September ini. Buku-buku ini akan dijual pada harga kos (RM 20/buku atau RM 360/set) untuk membolehkan setiap guru Sekolah Minggu memiliki satu set bahan **Lapan Permata**. Projek ini memerlukan RM 285,000 untuk menterjemah dan mencetak 1,000 set 18 jilid **Lapan Permata**.

## Alkitab Versi Borneo


Akhir sekali, Alkitab Versi Borneo (AVB) yang dinanti-nantikan itu telah diterbitkan. Ia adalah hasil usaha bersepadu oleh LAB Network yang bermula 15 tahun yang lalu untuk menghasilkan satu terjemahan Alkitab dalam bahasa Melayu.



AVB boleh didapati dari SUFES Pustaka di Petaling Jaya dan Pustaka SU di Kota Kinabalu.

## Satu Panduan Asas untuk Mentafsir Alkitab Mengikut Peraturan-Peraturan

Jika anda berminat untuk mempelajari asas-asas hermeneutik yang betul, ini adalah buku untuk anda. **Satu Panduan Asas Untuk Mentafsir Alkitab Mengikut Peraturan-Peraturan** adalah satu panduan yang boleh dibaca untuk mentafsirkan pelbagai jenis kesusasteraan yang terdapat dalam Alkitab; sama ada genre puisi, cerita, nubuatan, peribahasa, atau surat-surat. Ia ditulis oleh Robert H. Stein (Ph.D., Princeton Theological Seminary), seorang pakar Injil-Injil sinoptik yang merupakan Senior Profesor Tafsiran Perjanjian Baru di Southern Baptist Theological Seminary. Beliau juga penulis buku-buku seperti "An Introduction to the Parables of Jesus", "The Method and Message of Jesus' Teachings", "Difficult Passages in the New Testament", "Studying the Synoptic Gospels", "Luke", and "Jesus the Messiah."



Buku ini dibahagikan kepada dua bahagian. Bahagian pertama terdiri daripada empat bab yang membincarkan kaedah-kaedah am dalam pentafsiran; manakala bahagian kedua mengupas pentafsiran peribahasa dan kata-kata hikmat, nubuatan, puisi, simpulan bahasa, hiperbolik, perumpamaan, naratif sejarah, perjanjian, kod hukum, surat-surat dan lagu-lagu. Buku ini memenuhi keperluan orang awam dan pelajar seminari. Ia adalah sebuah alat untuk membantu orang yang percaya ke arah pemahaman Alkitab yang lebih baik.

Ia diterbitkan oleh Wawasan Penabur dan boleh didapati dengan harga RM 12 senaskah.



*Thank You*  
FOR HELPING US

Kami ingin merakam ribuan terima kasih kepada Saudara Christopher Chew kerana membantu Wawasan Penabur dalam memperkemaskan sistem perakaunan kami. Ini membolehkan dan memastikan kami dapat mempertanggungjawabkan setiap sen yang disumbang oleh para penderma kepada Wawasan Penabur. Chris adalah jemaat Petaling Jaya Evangelical Free Church (PJEFC).



## Menjambatani Komuniti Kristian

### Surat dari Pembaca Alkitab Kanak-Kanak

Nama saya Yapeim Jositin dari Kampung Mangin, Kota Marudu. Saya berumur 13 tahun. Saya telah membaca Alkitab Kanak-Kanak sejak saya berumur 11 tahun. Pada mulanya saya beranggapan Alkitab Kanak-Kanak adalah seperti mana-mana buku cerita lain yang pernah saya baca sebelum ini. Tetapi satu malam, saya mendapat sebuah ayat di dalamnya, "Allah sangat mengasihi orang di dunia ini sehingga Dia memberikan Anak-Nya yang tunggal, supaya setiap orang yang percaya kepada-Nya tidak binasa, tetapi beroleh hidup yang kekal." (Yohanes 3:16). Tiba-tiba saya merasakan ada sesuatu yang baru yang saya tidak pernah lihat sebelum ini.



Saya ke Sekolah Minggu setiap minggu tetapi itu tidak membantu saya kerana saya adalah seorang anak yang pendiam, dan suka menyendiri. Saya menghabiskan kebanyakan masa saya di dalam bilik membaca buku-buku. Saya fikir saya berbeza daripada orang lain kerana penampilan fizikal saya. Saya tidak mempunyai keyakinan diri. Tetapi saya telah mendapat kekuatan dari ayat yang saya dapat dalam Alkitab Kanak-Kanak "... setiap orang yang percaya kepada-Nya ..." Dan saya percaya! Selama ini, saya fikir saya tidak sempurna. Saya tidak takut akan Allah, dan tidak membaca Firman-Nya. Tetapi sekarang saya telah berubah. Saya membaca Firman Tuhan setiap hari. Saya sedar Firman Allah adalah rahmat yang sempurna. Saya telah membaca Alkitab Kanak-Kanak berkali-kali, dan setiap kali saya membacanya, saya belajar sesuatu yang baru walaupun untuk petikan yang sama.

Satu lagi ayat dari cerita yang bertajuk "Yesus Mengasihi Kanak-Kanak". Yesus berkata: "Jangan usir anak-anak itu. Biarkan mereka datang kepada-Ku. Hanya orang yang menjadi rendah hati seperti kanak-kanak sahaja yang akan masuk ke Kerajaan Allah." (Matius 19:13 -15). Yesus memberitahu kita bahawa kanak-kanak istimewa di mata Tuhan. Saya amat berbangga menjadi kanak-kanak kerana Yesus mengasihi kanak-kanak.

Alkitab Kanak-Kanak membantu saya untuk mengenali Tuhan. Saya bersyukur kepada Tuhan kerana Dia mengasihi dan peduli terhadap saya. Dia telah mengubah hidup saya dan memberikan keberanian serta keyakinan diri walaupun penampilan saya tidaklah seberapa.



Kawan-kawan yang dikasihi, saya ingin menggalakkan kamu semua untuk terus membaca Alkitab Kanak-Kanak. Sia-sia sahaja untuk pergi ke Sekolah Minggu jika kita tidak membaca Alkitab. Saya ingin memberitahu setiap kali saya membacanya, Allah membantu saya untuk memahami cerita-cerita, mengenali Dia dan saya rasa sangat diberkati. Terima kasih kerana membaca cerita saya.

Temanmu,  
Yapeim

# Menjambatani Komuniti Kristian

## Inisiatif Sikhem



Tahun akhir Alliah Baizura di Sekolah Alkitab ditaja oleh sebuah Kelompok Sel di PJ melalui Inisiatif Sikhem kami. Dia membesar dalam keluarga petani Kristian. Ibu bapanya sentiasa menggalakkan anak-anak mereka untuk menghadiri kebaktian gereja dengan setia, dan mengambil bahagian dalam aktiviti-aktiviti yang dianjurkan oleh gereja. Alliah dibaptiskan semasa dia berumur satu tahun. Tetapi ketika dia berusia 12 tahun, dia bergelut dengan persoalan seperti "Mengapa kita menyambut Krismas?" dan mula mencari jawapan. Kerana selalu dibuli oleh rakan-rakannya, dia mula cuba mendapatkan ketenangan dalam hal-hal kerohanian. Dia mula memimpin sekumpulan muda-mudi di persekutuan belia dengan berkongsi renungan Firman Allah. Pada 2011, pada usia 15 tahun, dia menerima Yesus Kristus sebagai Penyelamat dan Tuhan peribadinya.

Selepas SPM, dia mengambil keputusan untuk mendaftar di PPT (Pusat Pendidikan Teologi). Ini mengejutkan rakan-rakannya kerana mereka tahu dia bercita-cita menjadi seorang peguam. Keluarganya menyokong keputusannya untuk masuk ke sekolah teologi dan kemudian masuk ke pelayanan sepenuh masa. Dia kini menjadi pastor di sebuah gereja di Suangpai, Kudat.



Bulan lepas, Alliah telah menghadiri latihan "Lapan Permata" dan mula sedar bahawa Sekolah Minggu bukan setakat mengajar kanak-kanak. "Bagaimana kita boleh mengajar apabila kita tidak mempunyai satu kurikulum, dan jika kita sendiri hanya Kristian nominal?" Dan dia menyedari bahawa Lapan Permata bertujuan untuk melengkapkan guru-guru supaya mereka sendiri bertumbuh secara rohani, sebelum mereka mengajar Firman Tuhan kepada kanak-kanak. Lapan Permata mengharuskan guru-guru mengkaji Firman Tuhan, mentelaah Firman-Nya sepanjang minggu sebelum mereka mengajar kanak-kanak pada hari Minggu. Kebanyakan guru Sekolah Minggu menyediakan pengajaran mereka hanya pada Sabtu malam untuk kelas mereka. Tetapi Lapan Permata menuntut komitmen dari guru-guru untuk mengkaji dan menyediakan pelajaran. Masa dengan kanak-kanak itu ialah untuk mengajar Firman-Nya kepada mereka. Alliah menegaskan bahawa seorang penabur yang belum mengalami kebangunan rohani, tidak akan dapat menabur di tanah yang baik.



Seminggu selepas latihan itu, Alliah menggunakan semua teknik yang telah dipelajarinya untuk melatih pemimpin-pemimpin Pelayanan Kanak-kanak di gerejanya.


## Besar Setia-Mu



Wawasan Penabur kini memasuki usia 8 tahun! Kami bersyukur kepada Tuhan kerana kesetiaan-Nya sejak Januari 2009. Kami mengakui bahawa Wawasan Penabur wujud kerana pimpinan, pemeliharaan dan kesetiaan-Nya; serta sokongan daripada semua Rakan Penabur kami. Terima kasih untuk perkongsian dan dukungan anda dalam pelayanan "**Menabur Bahan Sumber Kristian BM, Menjambatani Komuniti Kristian**".

Tahun ini, kami mempunyai 5 inisiatif utama:


- (1) Mengedarkan 50,000 Alkitab Kanak-Kanak melalui kempen "**Satu Anak Kristian Satu Alkitab**" (SAKSA)




- (2) Mengedarkan 2,000 Alkitab Edisi Studi untuk pastor, pemimpin-pemimpin gereja dan pelajar sekolah Alkitab melalui "**Inisiatif TITUS 2:7**"



- (3) Menaja 20 orang pelajar sekolah Alkitab dan pekerja pelayanan belia, serta membantu 2 kunjungan misi melalui "**Inisiatif Sikhem**" kami



- (4) Memperkasa 1000 orang guru Sekolah Minggu dan Pelayanan Kanak-kanak (termasuk Tadika) melalui projek "**Lapan Permata**" kami, dan



- (5) Melancarkan dan mengedarkan 10,000 komik Injil dan Apologetika kepada belia melalui projek "**Yesus Mesias**".

**BERDOA** bersama kami untuk:

1. Perlindungan Tuhan atas pelayanan ini.
2. Perlindungan ilahi untuk kami dan keluarga kami.
3. Perlindungan untuk semua perjalanan kami.
4. Hikmat dan petunjuk dari Tuhan yang jelas untuk pelbagai keputusan bagi peluang-peluang pelayanan.
5. Jadual perjalanan dan perkongsian kami:

April	3	Taman Ujong Methodist Church
	17	Gereja Pantai Baptist, PJ
	24	Petaling Jaya Evangelical Free Church
Mei	8	SS Gospel Centre, PJ
Jun	5	Petaling Jaya Gospel Hall

Sila hubungi kami jika gereja anda mahu kami berkongsi tentang peluang dan cabaran yang dihadapi oleh Gereja BM di Sabah & Sarawak.

## Melayani Bersama Wawasan Penabur

Wawasan Penabur mencari orang Kristian yang telah lahir semula yang mahu melayani Tuhan secara penuh masa dengan bergabung bersama team kami di Subang Jaya:

### 1. Eksekutif Pelatihan

Mempunyai ijazah dalam bidang yang berkaitan, terutama sekali Teologi atau Sains Sosial. Berpengalaman dalam pelatihan sekurang-kurangnya 3 tahun, memiliki skil komunikasi yang baik, penguasaan Bahasa Inggeris dan Melayu (menulis dan bertutur) yang baik, mampu bekerja secara independen, kemahiran mengajar, memfasilitasi, membangun jaringan dan seorang ‘team player’.

### 2. Pelatih Penyelidikan dan Pelatihan

Terbuka kepada graduan baru asal Sabah & Sarawak (manapun bidang). Mampu bekerja secara independen, mahir dalam bekerja dengan orang dari pelbagai latar belakang personaliti dan budaya, mampu menjalankan penyelidikan, mempunyai asas alkitabiah yang baik, dan pendedahan dalam pelayanan gereja dan misi.

#### Yang berminat:

Sila hantarkan melalui e-mel permohonan anda bersertakan resume lengkap, gambar terkini berukuran passport serta salinan imbas sijil-sijil dan dokumen yang berkaitan kepada [wawasan.penabur@gmail.com](mailto:wawasan.penabur@gmail.com)

Siapa Kami

### Badan Penasihat

- |                      |                          |
|----------------------|--------------------------|
| • Rev Wong Fong Yang | • Rev Danil Raut         |
| • Lim Heng Seng      | • Rev Datuk Jerry Dusing |

### Badan Pengurus (Penabur)

- |                  |                 |
|------------------|-----------------|
| • Chow Chee Yan  | • Roshan Thiran |
| • Alfred R. Tais | • Randy Singkee |

### Staf Wawasan Penabur

- |                 |                     |
|-----------------|---------------------|
| • Randy Singkee | • Mactayren Jupiter |
| • Rasminah Oyok |                     |

Memperkenalkan staf Wawasan Penabur yang baru.



Maclaren Jupiter adalah Editor kami. Dia seorang Iban dari Saratok, Sarawak. Sebelum bergabung dengan kami, Mac bekerja sebagai Eksekutif Operasional Perubatan di sebuah syarikat antarabangsa untuk bantuan bencana dan keselamatan perubatan. Mac ingin menggunakan bakatnya untuk memperkayakan lagi sumber media untuk Gereja BM. Mac adalah jemaat SIB KL Sentral.

## Bagaimana Kita Boleh Bekerjasama?

### Membangun kesedaran dan menggalang dana.

Saya percaya pelayanan ini berpotensi jangka panjang. Saya ingin berperanan aktif untuk memberitakan inisiatif ini supaya orang lain juga akan beriltizam menguatkan gereja BM melalui tenaga, dana dan doa.

### Menyumbang kepada “**Kempen Satu Anak Kristian Satu Alkitab**” untuk kanak-kanak Gereja BM Orang Asli, Sabah dan Sarawak

### Menyumbang kepada “**Inisiatif TITUS 2:7**” Wawasan Penabur bagi menyediakan Alkitab Edisi Studi untuk para pastor, pemimpin dan pelajar sekolah Alkitab BM.

### Menyumbang untuk Projek “**Lapan Permata**” supaya bahan pelajaran Pelayanan Kanak-Kanak dapat dicetak untuk guru-guru Sekolah Minggu, Tadika dan Pelayanan Kanak-Kanak.

### Saya / Organisasi/Syarikat saya mahu menyumbang untuk pelayanan Wawasan Penabur.

Ini adalah sumbangan saya/kami untuk Wawasan Penabur\*: RM \_\_\_\_\_

Nama : \_\_\_\_\_

Email: \_\_\_\_\_

Alamat: \_\_\_\_\_

Nombor Telefon : \_\_\_\_\_ (rumah) \_\_\_\_\_ (pejabat)

\_\_\_\_\_  
\_\_\_\_\_ (telefon bimbit) \_\_\_\_\_ (fax)

Cek: atas nama “Wawasan Penabur Sdn Bhd”

Bank-in : Akaun Public Bank: 3127674507 atau Akaun Maybank: 5623 6663 2813

\* Sila fax/kirim/email bank-in-slip kepada kami.